


定香亭筆談

二



定香亭筆談

二



談筆亭香定

(二)

記元阮

定香亭筆談卷二

清 揚州阮 元記 錢塘陳鴻壽錄

丙辰秋。按試至嘉興。與試詩人雖多。尙未厭余所望。試畢。將行。有諸生獻其父詩。南野堂集二帙。舟中閱之。知爲嘉興吳澹川文溥所作。披吟終日。定爲浙中詩士之冠。關中草。閩游編。尤爲直逼古人。澹川居湖北。汪撫軍新戎幕。及歸浙。謁余於杭州。與語兩湖戎事。瞭如指掌。頗具才略。不可徒以詩人目之。余出先大父征苗刀示之。澹川走筆作歌。震奪一席。

吳澹川南野堂詩

入關

前山復後山。莽莽山頭月。古人復今人。纍纍山下客。朔馬當風嘶。征車夜中發。星河落人面。冰雪稜馬骨。壁立上蒼蒼。雞鳴關影白。

太華青濛濛。三峯開芙蓉。聳身踏落雁。危步攀蒼龍。高高白雲上。倏忽生虛空。窅然天地始。六合惟清風。自此九萬里。不知其所終。黃河走碧海。攬結衣帶中。逝將洗頭畢。濯足扶桑東。我行越陝州。清曉望潼關。終南散霜氣。衣上峯影寒。解鞍息僕馬。登城眺孱顏。風雲起四塞。渭洛交我前。東北橫大河。中斷龍門山。恃險不能守。爭雄良可歎。信宿驪山下。雨歇聞林鳩。虛巖韻幽籟。返照明高秋。韋公蘊真素。想見逍遙游。泉石餘綺麗。衣冠邈巢

由勝事行已矣。空山我何求。

九嶷何嶢峣。涇水注其麓。山風吹野色。霜草寒無綠。去鳥戀餘暉。流雲動疏木。當時祀雒上。佳氣連黃屋。炎精颯已遙。神物代相屬。鬱鬱松柏林。下有狐兔宿。立馬意蕭條。秋山問樵牧。

太乙下深黑。雷霆駐虛空。有龍宅其湫。飛雨白日中。南游女媧谷。北上銅人原。荒岡翳叢楚。古闕生墟烟。山河美如此。人壽速若彼。去去且爲歡。沽酒新豐市。無使明月來。照我持空杯。

跨馬出咸陽。緩轡行平疇。清吟苑柳下。迴眺陂塘秋。笑言展嘉讌。漁弋陪良儔。蒲苴引微繳。詹何颺輕鉤。素心既已諧。畢景彌悠游。商風忽驚暮。颯然吹古愁。甘泉廢馳道。玉樹凋崇邱。往者能幾時。我懷殊未休。

藍田好山水。漢陂秀蘭杜。蒼然紫閣雲。暮入終南雨。漠漠藤島村。梢梢竹團圃。荷蓀過前林。歸漁聞別浦。藹此父老情。爲我致清醑。久客憶江南。興盡非吾土。

青青原上麥。烏鳶自相逐。我行苦朝饑。藹然飽春綠。望雲陟高邱。采芳下西麓。念我堂前圃。白華有餘馥。媿彼循陔詩。徒倚迴車轂。

杜陵曲

金鞍玉勒杜陵客。駐馬垂鞭望南陌。楊花如雨不溼人。竹枝如烟澹暮春。忽憶江南春暮好。踏青湖上多芳草。如此風光獨異鄉。杜陵花月使人傷。

秋夜曲

華星耿耿月當戶。美人池上歌歌舞。芙蓉香老秋風多。風吹流螢亂如雨。夢裏輕羅不覺寒。醒來步轉生離緒。滿天清露送歸人。隔院啼蛩續人語。

紫驪馬

紫驪馬蹀躞。萬里何雄哉。不追赤日到西極。安知河水從天來。崑崙落空小於指。星宿滿地紛如埃。紫驪馬去復回生。還醉倒。酒泉郡。馬頭春色桃花開。不見前年大雪十丈高。連天人馬凍殺青海邊。

青門觀侯生舞雙劍贈益都沈八丈歌

侯生袖中有秋水。飛出芙蓉亂青紫。虛堂白日走精靈。夾電穿空血人臂。須臾一擲幾千里。碧海無聲老蛟死。座中蒼髯七十翁。滿酌金罍爲生起。自言年少時。頭角亦頗奇。彈碁與擊劍。遊戲無不知。雲門山中有老屋。穆陵關南春草綠。千年猛虎射殺之。徒手向前拔箭鏃。朝馳燕馬問盧龍。夜脫胡鉤舞鸚鵡。美人如花客如玉。往往哀絲間豪竹。分金呼管鮑。作賦邀鄒枚。肝膽時因酒邊露。笑口卻向杯中開。聞道秦皇古碑在。興酣獨上琅邪臺。當時搔首隘八極。未肯埋沒隨蒿萊。豈知如今意蕭瑟。入蜀游秦計轉拙。青門瓜落秋風多。白頭看劍當悲歌。途窮景短奈老何。嗚呼途窮景短奈老何。

招勇將軍寶刀歌

將軍偉然淮海豪。身長九尺腰帶刀。讀書萬卷不得意。要扶鼇極搏鵬霄。天生奇材必有用。持戟殿前

色飛動。名標宿衛。蒞親軍。出試戎韜。歷蠻洞。乃者紅苗暗九谿。苗氛毒漲。谿東西夾岸。旌旗天杳杳。萬山鼓角風淒淒。將軍手提三尺鐵。夜半橫行入虎穴。飛落空中霹靂聲。白是刀光赤人血。五寨榛蕪路已通。南山隅負尙潛蹤。爾時總制張經略。馳檄將軍趨首功。將軍突出間道口。矢石在前追在後。裏瘡轉戰九死餘。絕險梯空身不有。捷書申報大府來。枷杻赤立啼塵埃。力勸受降止盡殺。豈知骸骨半成灰。橫坡老稚將不免。苦賴將軍丐殘喘。好生惡殺天地心。忍以民命同雞犬。至今九谿千萬家。將軍功德流無涯。試看當時寶刀在。英靈出匣生風沙。不見于公駟馬呂虔佩。早卜他年子孫貴。公侯將相非偶然。義結仁深動天地。此刀殺人復活人。蛟龍氣涵江海春。寄語世間報恩子。勿棄螻蟻爭麒麟。

吳大帝廟

殿角響琅璫。松陰壓畫廊。神鴉寒觸火。石馬夜窺霜。山色金陵在。江流玉殿荒。飛揚懷古意。烟月墮茫

落雁峯

心。黃河洗秋色。太華削青金。飛雁不到處。白雲吹滿襟。天清玉女下。日出蓮花深。我欲此爲宅。蒼然萬古

三原夜發

馬背江南夢。春星滿客衣。可憐楊柳月。空照故園扉。累歲依人活。全家飽食稀。老親應倚望。無米亦來

歸

登華山

二華中天積翠開。巨靈高掌壓雲臺。無邊紫塞秋風起。一片黃河落照來。呼吸便應通帝座。登臨誰是謫仙才。蓬萊清淺崑崙小。人代茫茫去不回。

琅邪臺

琅邪臺古穆陵秋。指點金銀十二樓。天地東來橫碣石。滄溟北去抱神州。秦皇功德誣三季。夏諺諸侯勸一游。往事浮雲向空盡。老懷飛舞不能休。

江頭野步

未暝見斜月。獨行聞遠鐘。秋風先我至。江上落芙蓉。

白荷

已愛輕羅步屐新。更憐珠露洗秋塵。卷簾垂手明如玉。月滿西洲不見人。

元大父招勇將軍。於乾隆五年征苗。有戰績。家遺佩刀。澹川作歌後。兩浙詩人繼有作者。

招勇將軍寶刀歌

朱彭

秋河閃閃明星高。當天拔鞘天爲搖。鯨鯢可斷鐵可截。瞥見百鍊將軍刀。將軍起家備宿衛。八尺身長氣精銳。引滿時彎玉靶弓。騰空獨縱金絲轡。龍鱗袋貯呂虔刀。獨立昂藏一戎帥。憶昔旌麾駐九谿。跳

梁犵狔喧鼓聲。青布纏髻身裹皮。短刀林立利若犀。懸崖絕壁紛攀躋。綿亘山谷連東西。狼烟沖天鳥不集。將軍提刀竟深入。一片刀光電影飛。鹿駭獐奔盡驚逸。五寨居然一日平。報捷軍門抑何疾。南山大箐賊尙屯。將軍間道披荆榛。墮坑傷足不暇捫。直搗巢穴清餘氛。生擒俘虜幾千輩。苗欲乞生向刀拜。將軍殺叛不殺降。那忍株連同拔薤。後車捆載獲芻糧。勁卒搜羅陳器械。笳鼓喧闐奏凱還。饒歌作罷真雄快。餘苗歸洞荷生成。謀建生祠奠醪醴。歌呼跳月醉蘆酒。五十餘年慶太平。近傳騷動辰州旁。出洞擄掠還遠颺。嗚呼安得再生將軍鎮苗疆。賣刀買牛輸官倉。聖世服嘯歌樂康。

湯禮祥

將軍一身萬人敵。腰橫寶刀鐵三尺。飛空一片夜霜寒。壁壘旌旗盡無色。昔年奉檄征紅苗。九谿寨前殺氣高。負力恃險黠且驕。深林密箐愁獍獠。黃雲慘慘黑風急。將軍提刀出復入。戰血模糊戰袍赤。燭髑滿地行不得。報捷軍門五寨平。南山餘孽尙縱橫。此時再戰兵再接。萬帳降人馬前泣。將軍受降不殺降。降苗羅拜歸苗疆。戰績戎輶邁前代。犵狔聞名說遺愛。至今重人兼重刀。不數區區呂虔佩。酒酣月落共摩挲。蛟龍躍出腥風多。若將此刀鎮蠻府。威靈所到無兵戈。君不見漢家將軍馬伏波。天南銅柱高義義。

朱爲弼

靈臺偃伯清妖氛。平苗之績推將軍。將軍已往佩刀在。凌烟玉具同銘勳。鷗鵜碎花靈銘鏐。螭獸喪膽

逃紛紜何年金精司鼓鑄拔鞘迸落星辰紋苗民當日肆刼掠九谿賊砦屯如蠶飛毛坪前檄馳羽龍
家溪畔鳴鼓譟將軍提刀奮神勇電光閃處開風雲短兵相接斬萬級呼聲震谷迴斜曛餘賊橫坡息
殘喘神鋒所值破竹分渠魁旣殲機槍落刀乎此日無乃勤將軍凱旋報經略自洗血刃湖之濱雅歌
投壺整以暇部勒諸將屯輓轡腰間三尺示不用纏以鹿皮裹元纁降苗如蟻來紛紛男者面縛女足
韍經略大礮聲礮礮將軍入辨色閭閻奈何崐岡玉石焚遂開軍門受降虜白虎秋氣化作春氤氲至
今祠廟峙銅柱辰州苗疆有銅柱乃馬楚時所立見吳任臣十國春秋苗民奔走薦苾芬秋堂傳觀奇寶出蛟龍白日氣員員忠
仁之心脫光守匣中夜吼聲不聞從來名將不黷武必有哲嗣光斯文將軍文孫今昌黎泰山北斗士
望殷寶此赤刀作大訓文章黼黻佐聖君行看奕世偉鐘鼎呂虔三公何足云

陳文杰

風棱滿堂秋氣來寶刀出匣驚龍雷星辰搖搖海水立白虹一劃青天開將軍昔日初通籍入直明光
親執戟腰間三尺青芙蓉英風顧盼生顏色

詔書命典荆江兵獐花狁烏迎雙旌戰氛欲起白日暗寶刀夜作蛟龍鳴苗人鑄刀尺有咫鵝膏如雪
洗龍子一夜狼烟九谿起短刀林立三百里萬夫斫陣聲震天將軍突出爲衆先霹靂在手陰風旋燭
體墮地輕於烟九谿寇黨南山連負嵎虎踞崇山巔絕險轉戰驚飛仙苗降爭拜刀光前令嚴殺賊不
殺民以殺止殺全窮鱗寶刀拭淨不復用戰場花草生青春畏威戴德苗心死從此苗人不反矣甲兵

洗盡事春農。匣中刀臥銀河水。淮南學士將軍孫。秋濤三折開龍門。家傳文武世忠孝。手編家乘書前勳。秋夜沈沈月如練。滿堂賓客開文讌。寶刀捧出四筵驚。一片寒光射人面。想當盪決陣雲開。萬馬聲中激飛電。百戰歸來血洗稜。健兒十萬傳觀徧。古來戰績紀紛紛。殺戮成功從未聞。君不見秦國銳頭白豎子。漢家猿臂李將軍。

歙鮑以文廷博居湖州之烏鎮。長往來武林。博極羣書。家藏萬卷。雖極隱僻罕見著錄者。問之無不知其原委。嘗刻知不足齋叢書。及四庫書提要。有夕陽詩。盛傳於時。人呼爲鮑夕陽。余贈以詩云。清名卽是長生訣。當世應無未見書。何處見君常覓句。小闌干外夕陽疎。

仁和朱朗齋文藻能詩。畱心文獻。好金石。老而貧。居艮山門外清溪前。丁巳戊午間。助余編錄兩浙詩數千家。雨久穿屋流。余贈詩云。雨後清溪繞屋流。藤牀著膝看魚游。先生竟似陶貞白。萬卷圖書不下樓。錢塘何夢華元錫博雅嗜古。精審金石。久居曲阜。乾隆乙卯與余同至杭州。僑居西湖。余嘗贈以詩云。卻因風木常多病。不爲清狂始詠詩。一種閒情誰解得。夕陽林外讀碑時。夢華昔在曲阜。嘗步行孔林外。得漢孔君碑。黃小松司馬易爲寫林外得碑圖。

仁和趙晉齋鳳博學。精於隸古。尤嗜金石文字。歐趙著錄不是過也。予試杭州。得其書牆暗記移花日一詩。決爲名士。拆卷果晉齋也。

錢塘陳春渠振聲年七十。清灑似鶴。楷隸竝得古法。恬然閉戶。以詩自娛。蘇公詩云。神清骨冷無由俗。斯

人頗似逋翁也。鄉人重之。舉孝廉方正。

錢塘何春渚。淇詩翰。翛然遠俗。清介自守。老於布衣。余以孝廉方正徵之。春渚以詩卻云。章服榮身孰肯辭。性耽疎放未能移。閒臨遠水荷衣稱。深入雲嵐竹笠宜。薦士孔融真可感。思親毛義不勝悲。此情尙冀垂憐察。況是才非十駕時。予荅詩云。清聲無奈左雄知。老戀林泉未肯離。若論不求聞達好。此人曾賦卻徵詩。

錢塘朱青湖。彭老詩人也。著有抱山堂詩集。杭之學詩者。皆宗之。家故貧。甫能雕板。旋燬於火。青湖累被火。至是凡三矣。遷居後。仍近吳山。乞余書抱山堂扁。其舊扁爲丁龍泓所書。余贈詩云。白髮吟詩獨閉關。著書常被八人刪。龍泓未見山人癖。別起書堂又抱山。

朱清湖抱山堂詩

七夕詞

烏鵲過。停金梭。思之子。望銀河。銀河混混流。晴雪半規月上遙山缺。天邊牛女遠相望。不獨人間眷離別。吳姬妝成出畫樓。水晶簾卷涼雲秋。綵縷穿成月半落。花陰漠漠凝雙眸。月影花陰相度處。漸覺熹微天欲曙。天欲曙。黃姑去。淚汎瀾。灑秋雨。

寒夜對月聽李玉峯彈塞鴻曲

天寒夜靜孤月明。百衲古琴几上橫。霜飈忽向七絃起。滿座都作飛鴻聲。鴻雁銜蘆過塞下。斷續飛鳴

自嘔啞。黃沙白草遠連雲。天作穹廬蓋四野。聲聲掩抑風摧毛。風前相失求其曹。如繩不斷戍樓外。一聲直上狼烟高。乍隔狼烟看不見。金軫旋揮調忽變。千仞誰將矰弋施。將軍欲啓頭鵝讌。振翮高飛避尉羅。殺虎城邊競傳箭。瞥然孤影向關來。傷弓更覺鳴聲哀。邊笳亦鳴咽。邊馬皆徘徊。龍沙回首一南望。明妃愁上單于臺。愁對斜行乍明滅。交河日暮行人絕。隴外漫漫去路長。側耳遙聽尙淒切。此時流響不在絃。月光滿地寒如雪。玉峯子。舍爾琴。爾琴漫作邊關音。水仙一操移人意。與爾還從海上尋。

疊浪崖歌

攝山之高百餘丈。中有危崖屹相向。纍纍碎石千萬重。游屐來觀疑疊浪。上有撐空如繖之高峯。下有六朝不彫之古松。此崖迴合入樵徑。浪花都帶嵐烟濃。蒼茫彷彿春江瀉。長風欲把濤頭駕。乘興堪爲汗漫遊。石帆高挂從天下。定有翠髯鯉魚山。前招手遙相迓。我疑五丁力獨神。鑿石散作波瀾鄰。又疑天吳移海水。一夕忽變青嶙峋。造物茫茫不可測。諧談未許憑胸臆。且自支筇厓畔過。芒屨踏浪看山色。

月夜訪孫楚酒樓遺址過城西聞笛作

一醉下高樓。揚舲向石頭。伊人渺難卽。異代迴含愁。風月自千古。江山又九秋。城西誰擲笛。閒步亦清游。

登妙高臺

長江遠自岷峨來。金鷺昂首高崔巍。樓閣千尋白浪湧。山川四望青天開。林烟匝岸見歸鳥。雲氣盪胸無點埃。誰畱坡仙看落日。浩然獨棹輕舟回。

垂虹橋秋望

楓葉蘆花徧遠灘。蕭蕭風露作新寒。秋光三萬六千頃。獨向垂虹橋上看。

山陰邵夢餘無恙詩學極深。各體皆善。標格稍遜吳澹川。而性靈才調過之。真勁敵也。佳句五言。如陶然亭云。秋聲千樹盡。雪意萬山來。宿舊縣云。霜樹寒生野。天河靜對門。清涼山云。泉聲松頂落。花片竹陰飛。吼山云。石隨雲過水。樹對屋飛泉。夜發秣陵云。水門沈夜月。山影上秋河。渡太湖云。雲懶眠孤嶺。湖平立遠帆。自吳門旋白下云。古岸生春水。長江擁夜雲。棲霞云。山花眠麝暖。池月照魚涼。七言。如燕臺云。雲覆黃沙吞朔塞。河流白日下燕山。北固山看雪云。雲痕四合沈諸島。雪色中開見大江。永濟寺云。莎草綠盈三月雨。桃花紅入六朝山。姑蘇云。四時花月吳趨曲。兩國兵戎越絕書。晚泊石城云。荒壘齊梁猶上月。大江吳楚自分星。禹陵云。風雨鬼神趨古殿。鶯花士女拜春山。叢山云。婦女同仇兵氣合。山川重秀霸圖開。九日登通州城樓云。霜下邊聲來朔塞。日斜河色上城樓。又云。地夾關河三輔合。天無風雨萬山開。燕子磯暮望云。霜中草樹聲難靜。月下江山影倍寒。揚子暮潮空自落。秣陵秋色幾回看。雨泊三塔灣有懷云。大江殘夜生新水。微雨扁舟夢故人。晚過揚州畱別云。烟際白帆浮甓社。雪中紅樹認揚州。渡江云。丹徒城郭烟中度。白下江山雪後看。栖霞放舟云。青山入夢曾知己。明月同舟當故人。蘇堤曉步云。一湖靜臥

羣峯影。小雨香生萬樹花。秋夜云。鶴影倦依涼月立。雁聲寒帶夜霜飛。皆清新俊逸。雅近自然。夢餘原名。飄。曾官江南越中。商寶意後。僅見此君。

邵夢餘蕉雪齋詩

京江晚渡

遠海淡無色。微風夜潮長。陰霞江面生。新月渡頭上。放舟出瓜步。衝波時盪漿。大江無靜流。浪打石城響。

鳳凰山對月

離離雙梧樹。泠泠流素輝。朗月令人曠。興言上翠微。崇厓緣古堞。面面層巒圍。中橫萬里江。烟水空霏霏。東指棲霞嶺。西望采石磯。夜山如殘畫。淺碧痕依稀。席地羣呼飲。金波漾餘輝。長嘯拍洪厓。清妙暢天機。空谷蒼遙響。籟息聲漸希。醉臥仰明月。四空星滿衣。俯視松頂雲。卻在烏下飛。晶晶玉宇闊。竟御天風歸。

發龍潭至白門作

捨舟踏亂山。一路入空碧。村墟方曉霽。屋帶斷雲濕。虛谷多回風。松響滿孤石。暗水流廢畦。初陽照蒼壁。空野見微綠。中有早春色。一峯稜稜明。認是棲霞雪。十載江南游。層巒多所歷。行客與青山。相見如舊識。林岫雖故蹊。烟景自新得。譬彼清泉流。涓涓無滯迹。人行元化中。奚用感今昔。歲去不可留。百年

皆遇客。且酌白門酒。勞此髮未白。今宵照梅花。已非昨夜月。

題望雲思親圖

朔風無寧日。老樹無寧枝。枝繁根乃枯。成茲憔悴姿。親年不滿百。百年有窮期。子知養親日。已非親壯時。事親日苦短。況乃長別離。白雲東南來。招搖西北馳。親舍隔萬里。眠食何由知。朝得父母書。長跪讀書詞。得歸慎莫畱。不歸慎莫思。熒熒父母心。淚下如綆縻。仰視南歸雲。猶在天一涯。

送章芝厓出塞

男兒旣不能脅肩濫吹王門竽。又不能赤腳歸荷南山鋤。短衣揖客上馬去。北游直踏醫無閭。我聞路出飛狐道。北方健兒身手好。箭血秋紅幕下塵。鬼燐夜碧原頭草。古來戰壘長城多。花開塞下歌。邊歌已報將軍營。鐵嶺不須甲士枕。琱戈陸海自昔稱不毛。十年生聚成腴膏。如花女兒十五六。晝騎橐駝夜魚羔。送君曉度居庸口。夕陽繫馬關前柳。一夜新霜筆簞寒。行人爛醉邊城酒。城上黃雲如水流。松山白月挂城頭。西風吹起遼東雁。無限關山望越州。

道出白溝河書初白先生夾馬營詩後

平沙颯颯來陰風。萬木脫盡飛蒿蓬。白溝自昔界遼宋。百年戎馬曾交攻。黃袍聖人真英雄。鼎定洛邑開岐豐。玉斧劃河棄勿有。豁達大度誰能同。五季殺戮禍已亟。拓疆忍復興兵戎。兒孫孱弱成南渡。安可追咎祖若宗。錢王入夢索舊土。中有天意非夢夢。汴京破壞宮闕毀。藝祖寧不悲塵蒙。燕雲十六州。

作賂事由石晉難爲功。若云割界太示弱。亡宋況復非遼東。我聞德至四裔守。無德焉用爭提封。君不見秦滅六國吞寰中。長城萬里防邊烽。楚人一炬咸陽空。

游焦山飲梅花樹下贈楊明府

一山如斷雲。四圍海氣白。中有千葉萬葉梅。江流倒漾花光碧。楊侯邀我酌梅花。拂衣便坐花陰石。夕陽沈沈不到地。交柯密蔭幹若鐵。幽根半埋霹靂厓。寒枝高壓虬龍宅。一度花開一歲春。孤清不鬪江南雪。試問梅花爾誰植。昔年曾否焦仙識。碧海風迴有異香。空山雪滿無行跡。我疑古梅花。卽是高士魄。一客爲橫琴。一客爲吹笛。玉管朱絲調未終。綠英飛下流霞席。我抱梅花醉欲眠。一身都化青天月。

題唐陶山仲冕岱覽圖

赤日躍海危巒紅。九土色破青濛濛。活雲如虬踏雙足。嘯聲吹墮松風中。碧天飛下雙白鶴。化爲綠髮青玉童。爲言洪厓在絕頂。方攜雲笈還崆峒。名山五千禹域內。茲嶽如海稱朝宗。獅蹲虎伏不可數。牛眠鵲起多幽宮。山川圖經久廢蝕。幾人筆力開鴻濛。廿年冥想結崇巘。君夢所見將毋同。豁然頓悟振衣處。卽此萬仞高穹窿。三十六盤重復重。天門浩浩來天風。一枝七尺披雲笈。一兩不借踏雪樓。凌雲醉拂日觀峰。袖間攜滿青芙蓉。釋山自號陶山子。況近先隴悲楸松。君母厓于陶山卽岱山支麓也。遂著岱覽三十卷自號陶山子。著書聊述倚廬志。作圖尙感前游蹤。惜我五嶽未登一。正思開拓層雲胸。名山入手如可從。徑欲吹竹騎蒼龍。乞君奇書秦樹東。手披或有仙人逢。